

宣統新疆圖志

新疆圖志卷三十

賦稅一

大清龍興遼瀋定都幽燕凡前明一切苛賦一旦掃除淨盡至順治十四年頒賦役全書

飭各省凡屬墾地概行薄征至荒徼初墾之田則定爲三年或五年始行升科蓋所以

體恤邊民綏柔荒服者可謂詳且盡矣西域自漢武開疆雖已悉隸版圖然不遑遐復入貢不至時侵時叛而已度地居民徼田定賦之法固概乎未曾議及卽元代發祥金山幅輳最廣然考西域諸傳亦不過就地屯田暫爲用兵之計並無深思遠慮以爲上益國課下培民生至意

大清興

仁

純兩廟初平準噶繼定疆疆取異族而赤子之聯殊方而一體之

推

二聖之心以爲同屬黃帝子孫而竟隔於地勢囿於習俗木石與居鹿豕與游不得沐中原禮樂文章之盛君臣父子之休則是天地之大不能無所憾故奮揚威武肆厥聲靈顯爲諸族開文治卽隱爲天地彌缺陷至區區之土地財賦又何足深計然而乾父坤母者

列聖之運量而獻芹貢曝者野人之真忱父兄勞碌而子弟願坐而享之新民雖愚亦不忍出此矧復天山南北葱嶺西東墾地至數千萬畝之多因田升賦在

國家可得點滴之益在吾民亦可紓孺慕之誠故自同光以來官斯土者如左文襄劉襄勤諸公率皆清丈地畝斟酌糧草或照內地至輕至薄之制垂爲定例或仿荒田三年五年升科之意以廣招徠非損下以益上也順民志以紓民情而已作田賦志以資後世之考焉

新疆地雖邊荒然古書稱牧畜蕃盛水草豐茂則其地質肥腴宜  
禾宜黍亦概可想見自康熙間發巴里坤兵五十赴吐魯番禦準  
部雍正三年闢展回子內徙田地盡起荒蕪至數十年至乾隆二  
十年蕩平準部移瓜州踏實小灣三堡舊居土爾番回人歸土爾  
番所遺地畝始招佃承種戶三十畝官給籽種牛具秋成後扣籽  
種以什之四輸官行之四載定額升科編入民賦此爲哈密以東  
田賦之始若哈密以西則自塔爾納沁撥黃墩營兵哈密卡倫兵  
各二百試墾著效遂爲屯田開端自是北疆則自闢展而五堡而  
烏吉而羅克而朴城子而全蘇而伊犁而晶河而庫爾喀喇烏蘇  
而瑪納斯而蔡巴什湖而塔爾巴哈臺而木壘奇台而濟木爾而  
牛毛湖而吉布庫而古城凡十七區南疆則哈喇沙爾而托克三  
而哈喇和卓而阿克蘇而烏什凡五區不出十年兵屯旗屯遺屯  
回屯戶屯徧及南北此時田盡屬屯有糧而無賦戶部定功過則  
例收獲訶分數以畝收一石爲十分少不下七分多或二十八九

分不等

兵屯之制

一夫撥田二十畝上給籽種牛具歲納十二石至十八石視地爲差

遺屯之制

一夫撥田十二畝歲納六石無差等上給籽種牛具僅兵之半故納糧亦半之

旗屯之制

嘉慶七年松文清爲將軍時分惠遠惠甯二營移熱河西安甯夏涼州莊浪各滿兵駐之一兵分地三十四畝永爲世產自耕自食不納糧租又分錫伯索倫察哈爾厄魯特四營移盛京黑龍江張家口旗兵外及達什達瓦屬衆安插熱河者哈薩克右魯特自準部均設新沙畢納爾人隨土爾扈特歸順者駐之亦各有分其地則吉格爾等處四十一區但族類龐雜耕少牧多

回屯之制

視兵與遺小異計戶不計丁計籽種不計畝戶給籽種二麥一石穀黍五斗二麥約收二十分穀黍約收四十分定以一戶歲輸十六石爲額餘則聽其自留其地則海努克處等九區

戶屯之制

上不給籽種牛具一戶三十畝畝徵租銀五分不徵銀者以歲交細糧八升爲額其地則自伊犁晶河庫爾喀喇烏蘇至烏魯木齊之迪化州喀喇巴爾噶遜頭屯所蘆草溝塔西河阜康濟木薩昌吉綏來呼圖壁巴里坤之沙山子奎素石人子南路之喀喇沙爾阡陌相接大率以無礙屯工之隙地撥令民間開墾按例升科永爲正著

乾隆四十年考核大數兵一萬三千九百餘名遣則大約每年二千五百人之數於南北各疆共屯田二十八萬八千一百餘畝而回屯旅屯尙不在列戶屯時已墾地七十餘萬畝視兵遣二項數

已倍之

國家以殖民爲務故自是以來專於戶屯措意而兵遣二者再未議加此乾隆間屯田收糧之大較也厥後回亂數十年歷道咸同三朝人多流亡野皆暴骨屯田蹂躪荒熟俱不可考亂平以後始以今鎮迪道所轄屬地據道光二十三年間至咸豐二年冊報查出內地本地各戶認已墾地田共一百三十六萬六千九百九十餘畝定則升科撥歸甘肅藩庫收報歲徵本色京斗糧九萬六千四百餘石科則約分三等有按畝徵京斗糧九升六合三勺者有減半徵收四升八合一勺五秒者宜禾奇台等處則糧草並徵按畝徵糧四升一合八勺七秒六撮草則折糧三升此亂平後鎮迪道屬百定田賦之要領也南路及西北各地額糧仍歸分駐大臣庫爾喀喇烏蘇精河二糧員經管徵收與鎮迪各屬大致相同光緒十一年開設行省十三年劉襄勤相度地勢除去昔年民屯兵屯園租地畝舊制以當時民墾各地斟酌升科清丈之後奏定北

路迪化昌吉阜康綏來奇台吐魯番濟木薩呼圖壁各屬均按上中下地畝分別升科上地每畝科糧七升中地四升下地三升照章不徵草不徵耗其鎮西哈密庫爾喀喇烏蘇精河俱照舊章科則南路當分駐大臣經營時科則不一並有徵收銅觔普爾錢等項者左文襄派員辦理善後徵糧各局暫按原額徵收至是襄勤以今昔殊情糧草各節亦宜按時按地酌爲變通因奏上地每畝科糧四升五升不等科草五觔中地每畝科糧三升科草三觔下地每畝科糧一升五合或一升不等科草二觔亦概不徵耗其折徵銅觔金課地畝向章無論是否業金業銅戶民但係額徵銅金之地卽須交納銅金改章程後均一律酌徵糧石又各城向有伯克養廉地畝自改郡縣伯克多經裁撤廉地准歸官招佃承種額糧照則收納卽未裁伯克廉地及撥作義學壇廟香火各官地均科額糧至額徵糧石以小麥六成包穀四成徵收間有搭徵稻穀之處其距城二百里以外完納本色不便者則准完折色按時價



酌定每小麥一石折銀一兩包穀一石折銀六錢但倉儲爲國用所關又以多徵本色爲要擬定需糧較多之區則全徵本色或僅折三成或准折五成或量准五成以上隨時酌辦草束需用較少折色較多每百觔折銀五分永爲定例綜計通省南北三道屬共荒熟地一千一百四十八萬一百九十餘畝除未墾荒地暫未升科外其已墾熟地每年應徵本色糧二十萬三千二十九石二斗三升八合二勺應徵本色草一千三百九十五萬八千二百一十六觔一十兩二錢八分應徵糧草折色及地課銀五萬七千九百五十二兩一錢六釐二毫一絲七忽此開省後初定全省田賦之等則也二十八年巡撫饒應祺因認繳賠款始請加徵耗羨不分糧色本折每石隨糧徵銀壹錢五分二十九年巡撫潘效蘇又改定糧草本色一石連耗准收糧一石五斗五升折色一石連耗准收銀二兩三錢北路向無折色全徵本色亦准每石連耗增至一石五斗五升但名目愈多積弊愈深不肖官吏相率浮征變本加

厲甚有加收至數倍者布政使吳引孫署巡撫時知其流弊太甚  
檄行各屬仍照舊則徵收三十三年巡撫聯魁布政使王樹枏一  
再訪查扶其弊之根源仿胡文忠撫鄂清釐漕弊辦法使浮收之  
數和盤託出明定羨餘自光緒三十四年起折本均於正糧一石  
耗餘銀一錢五分外加收耗糧二斗五升爲地方官辦公之用一  
切地脚驗糧淋尖踢斛諸名目禁革淨盡折色以每年市價定折  
價凡市價高於舊章折色例價者所贏悉數歸公額草本色百觔  
加羨五十觔折色百觔正羨統收銀五錢核以例價百觔銀五分  
所贏以一半歸公一半作地方津貼一切浮苛攤派名目亦概行  
革除試行兩載南疆百姓歲省三百萬金上下民既無所擾累官  
亦不致困難宣統元年遂以新章稟請

敕部立案奉

旨允准綜計宣統三年清丈地畝確數其熟地一千五十五萬四  
千七百五畝五分五釐歲徵京斗糧三十萬二千四百七石五斗

六升草二千八百二十七萬二千三十九觔糧草折色庫平銀九萬四百九十餘兩此近年田賦確數並加徵耗羨明定羨餘之情形也惟是新疆墾熟之地不及十分之一二曠土荒田所在皆是民益加多而賦不見增至豪強兼併者流往往有數十戶冒爲一戶者經界不正子與氏所以歎爲仁政之莠也謂宜將南北兩路逐一清丈以杜隱匿而均貧富並設法籌款開渠引水廣招流亡隨處墾荒則民生可裕而國賦亦當有日增之勞

新疆圖志卷三十一

賦稅二

榷稅

後世襲衣博帶之儒動曰盛朝不言有無帝王不計財貨以天子之尊下與黎庶較錙銖不便孰甚焉豈知山海爲天地自然之產稅課乃國家應有之權周禮者周公致太平之書也上至山林藪澤下至津關市廛無地不賦無物不貢無人不征無事不稅極之至纖至細米鹽酒醬之類亦復定爲經制設爲條款以元公大聖而爲此瑣屑細務豈剝民以利己哉一以杜豪強專權兼併之狡謀一以示吾民崇本抑末之深心且以取天下之財治天下之事收天下之利安天下之民而已矣由漢迄明立法雖不盡同要其大致不過如此我

朝肇造區夏蕩滌繁苛不特秦之丁口錢漢之算緡法唐之間架稅宋之月椿錢明之金花雜賦等項一掃而空卽關海鹽鐵爲天

經地義國家應享之權利猶復

溫綸詰誠至再至三煦煦然如父母之於兒女惟恐稍有剝削稍有誅求也至酒醪米穀則惟燒鍋曬麵是而嚴不專設榷酤之務五金產地則以聚人生事爲戒而不計及礦稅之饒他如寬漁課以恤海濱之民定牙契而嚴胥役之禁所以爲小民計者至深且遠中興以來西陲底定拓地周二萬里之廣內地商賈持幣帛以來者論躡萬計天山以南玉門以西昔爲游牧佳場者今則爲商埠重地矣律以各國值什抽五抽六之例則新疆稅款歲入當不下數十百萬而乃減之又減輕之又輕考其所取不過二三十分中之一耳嗟乎國帑如此艱難庫欸如此支絀雖在婦人孺子亦欲貢曝獻芹下盡孺慕之誠上紓宵旰之憂而

聖天子終不以公家拮据下累萬姓遙稽百世以上旁考四海以外賦稅之輕未有過於

本朝者茲因編全省稅務聊撥數言記諸簡端用以明我

皇上愛民如子之苦心並以動我國民忠君愛國之思想已爾

稅務緣起

邵陽魏氏云哈薩克三部有汗王公台吉世襲以理其游牧三歲一貢歲一市以馬羊易緞布而稅其百一布魯特亦如之又云浩罕土產甚貧全賴諸夷入市貨稅以資國用是卽新疆權稅之始嗣後地勢漸闢諸種人民暨貨物日以繁盛各色稅目亦由是而起

房稅

乾隆二十八年將軍明瑞奏准伊犁商民來集漸多俱於城外尋地自修房屋宜按照房間大小定數收稅頭等房每間三錢二等每間二錢三等每間一錢三十七年將軍舒赫德奏酌定房屋條規三則一鋪房稅契宜變通立法刊刻契紙編行以資查考一買賣房產宜設立牙行責成查考一現在所有白契應盡行呈官以

蓋黔印俱經軍機大臣議准施行迨後鋪店房間開閉無常每年約徵銀一萬二三千兩不等

牲畜稅

牲畜稅無定額約歲徵銀四千六七百兩

牙行稅

伊犁各城牙行二十六名歲徵銀十五兩六錢

園稅

伊犁戶民新墾之園地歲徵銀一千餘兩

煤窯稅

乾隆四十七年將軍伊勒圖於崆郭羅鄂博一帶大山頭石人子甘溝三處開設煤窯二十四座內長年挖取者十六座有夏秋地氣薰蒸不能入洞採取惟冬春始能開挖者八座均照

盛京煤窯之例每座獲利以十二股抽分每年徵收稅銀三百二十四兩八錢五十年添窯十二座加增稅銀一百三十四兩六錢

五十三年塌密二座減銀二十一兩七錢實有密三十四座每年  
征銀四百三十七兩七錢

謹案以上五項所征稅額俱就乾隆時言

木稅

伊犁南北山場林木葱鬱俱聽人民自行砍伐嘉慶十一年將軍  
松筠奏請於商民內擇其妥實者設爲商頭官給驗票約束人民  
稽查出入定以每木百根抽分七根板片抽分之數亦如之計自  
十一年八月起至次年八月止抽收大小木植板片共七千四百  
九十九件一歲如此餘可類推

百貨稅

自同慶貨稅者以制商在左海英商土貨京清川兩洋  
貨稅計開六項一、土貨稅二、洋貨稅三、雜貨稅四、  
雜貨稅五、雜貨稅六、雜貨稅

嘉慶以來逆回張格爾金相印白彥虎等相繼煽亂全疆商務不  
能暢行者數十年光緒初年漸臻底定商販四集

欽差大臣左宗棠以餉源不濟仿照各省百貨釐捐抽收釐其稅  
見於光緒六年四月十七日籌辦新疆善後事宜摺中云釐稅一



項就各局冊報計之自四年秋至五年夏不足一年已收銀十八萬有奇亦稱入款大宗如伊犁事定商貨暢行當必更有起色行之未久奉

旨裁撤光緒十一年戶部以新疆既建行省所有鹽法茶務關稅錢法庫儲均宜次第講求以圖經久於是巡撫劉錦棠酌於哈密設局專收南由陝西出嘉峪關從哈密入境之貨於古城設局專收北由包歸出蒙部草地從古城入境之貨巴里坤地僻貨少又鄰近哈密由哈密關員酌派司事巡丁分駐查收作為哈密分關至哈古附近均有歧途繞道不免奸商偷漏均由各關員相度地勢分卡稽查兩關稅務均以鎮迪道為監督掣發道印稅單所征關稅銀項先由該道核收轉解藩庫其征收稅則按照市價估值每貨價銀一兩定征稅銀三分惟土芋一項非日用必需之物以六分征收一稅之後任其行銷何處再不重征其南北兩路土產貨物亦照市價征收三分惟祇稅其大宗零星小販概從寬免且

不設關卡不發委員由地方官招股實大商開設牙行仿照南省風氣商民交易貨物概由牙行經手准其收取二分行用應征貨稅銀兩責成牙行報繳地方官收存轉解

### 茶稅

官茶向由甘省每引完納正雜課釐四兩四錢四分復由肅局抽收出口釐金每票銀二十兩嗣茶商恒成順等懇將應完出口釐金永在哈密照章完納陝甘總督左宗棠批准由哈局征收前飭於行銷地方抽落地稅一道按價每兩完銀三分光緒八年巡撫劉錦棠飭將落地稅項一律豁免復因釐金停止出口釐稅仍歸肅局辦理十一年立哈密古城稅局新擬章程飭每引稅銀一錢每百觔稅銀二兩每票稅銀八兩其出口釐金仍改歸哈密征收落地等稅永遠豁免北路千兩百兩等茶除按照甘章完納正雜課釐外亦應按每引百觔稅銀二十兩以歸畫一惟販運自毫武彝珠蘭普洱大葉香片六種細茶成本既重獲利較厚應照稅

則遞加以公平

附錄哈密古城稅則九條

一哈古創設稅局是專征內地東來之貨至南北各城土產貨物  
應由該地方官就地征稅報解設局以後如有各城土產販運東  
來者哈古各局不得重征以符一定稅章至於俄商及西域外部  
來貨應俟商務暢旺議定稅則時再行起征洋稅現在邊關未設  
遇有西域外部來貨聽其落地過境哈古局不查不稅以示區別  
一哈古設局以後商貨到地投局報稅隨時掣給稅票不准片刻  
遲延商貨過境長運者遇有稽查分卡該商執票呈驗放行不准  
絲毫措勒其已稅之貨賣與哈古本市復經商民轉販者概免重  
征惟起運時務將原報稅票夾同該鋪發貨清單內赴局驗明將  
單填註年月加蓋本局關防給與該商爲據遇卡呈驗放行以杜  
東來未稅之貨繞漏濫混等弊此項稅單務須隨到隨印不准留  
難措索違者准商民稟究

一局內稅銀係屬庫儲正欸下收上解應概歸一律庫平遇有零頭找尾一時收銀不便搭天罡銅錢不得過三錢以上餘須一律收銀以解藩庫稱驗百貨概用湘秤爲準不准假用市秤高下其手致紊定章

一商貨有偷漏一經查出除照章完繳正稅外再照正稅之數罰銀三倍隨時張貼曉諭所收罰欸一半充公報解一半由局員秉公給賞以儆效尤而勸巡查仍按月彙報以備查考

一設立稅局只征車駝販運大宗客貨其餘零星小販藉以謀生成本不滿十兩者概行免稅以恤民艱

一稅務爲庫儲正宗各營署委員差弁因公往來不准夾帶包攬隨從丁夫兵勇人等必須嚴加約束違者查出重究如係軍裝官物應驗明將軍都統及各大臣公文註載件數如無公文或文內並未註載明白概令繳稅各該局卡務須秉公嚴查毋得瞻徇情面致干併究

一設局收稅原爲餉絀起見一切公費務從樽節省得一分則公家多出一分餉項全賴任事之人共體時艱視公事如家事惜公款如私款破除情面實力實心事無不濟當卽酌定薪水一專責成哈城稅局派辦理稅務委員一員月支薪水銀四十兩油燭紙張火食銀四十兩收稅寫票司事一名月支薪水銀二十兩文案帳務司事一名月支薪水銀二十兩巡勇六名月給口糧銀各四兩五錢伙夫一名月支口糧銀三兩雜夫一名月支口糧銀三兩古城局布置一切照哈局章程辦理

一各局委員如果廉正勤能三年內稅旺無過准委署繁缺次一司事每月薪水發半存半兩年內勤廉無過記功彙保如有過犯卽將所存薪銀一並發充公款驅逐出局巡勇每月口糧亦給半存半倘有過犯將存銀一並充公解遞回籍決不寬貸苟能實心辦事忠直無欺一律記功酌獎以勵其餘

一餉源奇絀急宜講求節儉局員處聚財之地平日所抽者豐告

貨糾纏必多且銀錢在手易於揮霍非刻苦自勵一如在家時布  
衣蔬食雞黍留賓不能保其廉潔至於贖金罰款各局員自顧不  
暇何能惠及朋友尤宜一概謝絕本大臣爵部院上年通飭南北  
兩路各地方官營局嚴禁虛文款賓至多以八筴爲度山珍海錯  
悉禁不用卽查照一體辦理倘有仍蹈從前惡習專務虛文不節  
浮費一經虧空舞弊侵公本爵部院斷不能爲之曲宥也懍之慎  
之

謹按以上章程俱光緒十一年巡撫劉錦棠擬定者

豁免華商貨稅暨復征華商貨稅原由

光緒七年中俄條約准俄民在伊犁塔爾巴哈台喀什噶爾烏魯  
木齊及關外之天山南北兩路各城貿易暫不納稅俟將來商務  
興旺再由兩國議定稅則在

朝廷本以睦鄰恤商起見而利之所在弊卽因之華商因俄商不  
納稅之故賄託包庇謂較赴局完納尙爲合算俄商視爲利藪不

論土貨洋貨輒行包攬甚至屬中回部亦復冒稱俄人希圖蒙混  
一經查出則又捏報領事文牘往返轉輻滋多華商藉其庇護雖  
得微利生計仍是日貧巡撫陶樸深稱斯弊

奏云同爲生計所係此行設免苦樂既嫌不均而賄賂包攬以應  
得之稅銀轉隱入俄商之手事理尤太平與其以無限貨產流  
溢外人莫如保固有權利惠我商民且歷年所收貨稅自二萬至  
五六萬而止局卡經費又於收數內以二成開支通盤計算所  
籌之款爲數究屬不多卽無此銀公家亦不至大損爲目前補偏  
救弊計惟有籲懇

天恩將華商貨稅暫行停止以紓民困至此項稅銀既裁新疆經  
費愈形支絀當督飭司道遇事節省極力彌補斷不敢以出款  
不敷另請指撥仰副

朝廷鄭重帑儲至意光緒十九年奉

旨依議欽此嗚呼疆臣防弊之深心與愛民之隱念亦可謂至矣

盡矣無如中原多故需財孔急新疆前此歲收稅銀六萬有奇者至此僅三萬四千八百餘兩安常處順猶慮不支而賠款四十萬又復飛咨來催無米之炊巧婦果能做乎於是巡撫饒應祺具奏云新疆邊荒枯瘠生計維艱開鑛興屯既難遽收成效墾荒升科亦難急議加征惟稅務取之於商尙於民生無損雖從前征數無多究於公家不無裨益現在漢民回民陸續出關日增月盛人數較衆貨物銷路當亦較寬如能經理得人嚴禁偷漏刀杜中飽涓滴歸公歲收或有起色如蒙

俞允先就省城設立總局遴選精明強幹之員充當提調查照原案舊章就今昔殊情斟酌損益再行擇要設立各路分局委員按章抽收嚴查包庇營私諸弊以塞漏卮涓涓之流漫成江河似於餉源不無裨濟於是部議云俄商貨稅尙未議辦先辦華商貨稅倘有奸巧華商假託俄商包庇隱瞞誠恐利少弊多於籌款難期實濟然使待俄商貨稅議辦有成再辦華商貨稅無論俄商貨物



將來能否抽稅現時尙無把握即使果能另立條約議立稅則而往復會商開辦亦仍需時日現在新疆需款孔殷着即將華商貨稅先行籌辦以顧要需但貨稅既徵情弊亦應預防應由該撫遴派妥員明定章程通飭總分各局認真稽查斷不使華商影射俄商致貨稅稍有偷漏是爲至要至開支局費各省多係一成該省從前開支二成未免浮多亦應照數核減以杜虛糜嗚呼旋免之而旋征之豈前後疆臣意見各殊哉亦時勢所迫俱有不得已之苦衷存乎其間也已

### 附錄征收華商貨稅章程

一省城設總局

收兩路入貨之票准印

哈密

收內地入貨之貨

古城

收中路入貨之貨

綏來

收伊犁塔城之貨

阿克蘇

收八

吐魯番

收本地土貨之稅

瑪喇巴城

收內地土貨之稅

共六分局

光緒二十八年設

二十

九年添設

喀什噶爾

回城局

抽收東北各商社入貨之票稅並收喀什本城土貨之稅

九年添設喀什噶爾回城局

抽收東北各商社入貨之票稅並收喀什本城土貨之稅

伊犂塔城局

一如喀什等處之章程收入貨之票稅

莎車府局

一如喀什等處之章程收入貨之票稅

一如喀什等處之章程收入貨之票稅

一如喀什等處之章程收入貨之票稅

抽收各商社入貨之票稅並收本地土貨之稅

抽收東北各商社入貨之票稅並收喀什本城土貨之稅

一如喀什等處之章程收入貨之票稅

一如喀什等處之章程收入貨之票稅

一如喀什等處之章程收入貨之票稅

一如喀什等處之章程收入貨之票稅

一如喀什等處之章程收入貨之票稅

一如喀什等處之章程收入貨之票稅

是年以概

一關外情形與內地不同徵收未便過於繁重宜按各海關值百抽五稅則酌減改爲值百抽三無論外來一律辦理

一凡華商販運貨物均照起落征收如由省販貨赴有局地方銷售者均於省局收起稅各局收落稅赴北路之伊犁塔城則綏來局攔收落稅赴東路之鎮西則古城局攔收落稅赴南路之西四城則瑪喇巴什局攔收落稅中間經過阿克蘇局祇驗省票放行不重收稅惟赴無局地方如庫車拜城新平喀喇沙爾等處則於省局抽收起落兩稅以符一起一落定章至由各路有局地方運貨來省銷售者則各局收起稅到省收落稅其應攔收起稅及到省應收起落兩稅者均仿照出省之貨辦理惟出省來省並應於完稅時報明來去地方填載票內以上係專指省城之出入貨而言其餘可類推要之起處有局落處亦有局者則此局收起稅彼局收落稅若起處有局落處無局落處有局起處無局者無論經過何局均須查明起落處所並收起落兩稅於填票時詳細載明

一芋土一項關由內販來者固多而本地如北路之奇台綏來伊犁南路之布告爾烏什等處出產亦不少不特漢民吸食纏民亦漸沾染銷路較前更暢先年停局時歸地方官酌爲收解現定一並歸局辦理仍照舊章每百兩收稅銀一兩如由關內及南北路運省銷售者經過何局由該局收起稅一道到省收落稅如由無局地方運省銷售者則由省局收其起落兩稅外局照省局辦理均定一起一落之數

一近年屢奉部章芋土與燒酒均非民間日用必需之物應照章加重每百斤酒收稅銀四錢無論外來暨省城燒坊均一律征收外局亦照辦理

一官茶向由哈密局抽收一稅之後不問所之現新疆各號茶大半裁撤多爲他商由蘭號販運而來茲均定每票由哈密局收稅銀百兩暨委任赴何處再不重征惟由甘涼草地繞越哈密局者則無論經過何局均照章收稅一道

一各局向用稅票及黏貼煙土印花均由總局印發其稅票仍用聯四按局編字列號一存根存局一齎核按月彙齎一執照發交商人收執一查驗亦發交商人經過下局截留按月彙交總局至各局填給執照查驗時應詢明運往何處銷售以便落地時互相查核其下局截繳一驗亦須蓋用某局驗過圖記經過省局亦然一此次復開稅務官商宜視爲一體其聯絡之法如省城京津川楚山陝甘涼及本省各幫各舉商總一名爲官商合一之計准於貨到哈密古城之日除上煙應黏印花外其餘只照發單納稅於箱上黏貼封條票上載明箱數並不開箱查點到省之日由商總開單報局與總查委員公同點驗如無偷漏則已倘查有在哈密古城隱匿情弊從重罰究此責全在商總切實奉公二年之後如果商總得力稅務暢旺卽由局詳請給予獎敘以示鼓勵

一設立商總所以通商情盡商利也但人心不一又慮各幫不無徇庇亦不能不互相箝制因於省外東南北三路分設查卡貨入

則查驗車馱箱隻數目飭丁報局貨出則驗票放行商總知有卡員查報自不能徇隱卡員知有商總查報亦不敢玩忽而索賄留難之弊除

一稅務一切事宜概歸鎮迪道兼按察使上政仍會藩司銜協辦俾專責成

一局內一切文牘由提調督同委員核定辦稿呈請判行後發局簽押關防存局隨時蓋用

一總局除派文案核銷收支三員分司各事外向章設有稿書一名應改爲收發委員專司送稿簽押及收發公文管理卷宗等事又舊章設票書一名算書一名清書三名查貨司事二名茲於票書算書清書等名仍其舊而清書少用一人改爲平書一名查貨司事二名改爲總查一員以上各員均參用候補佐雜如新餉所書識之例既可量材任人又可疏通差使此外巡丁什長一名巡丁八名雜夫伙夫共三名又南路纏民運貨到省照章抽收落

稅則言語文字之間須用通事毛拉各一名均係仍照舊章

一商民照章完稅應交庫平銀照官錢局定章以現錢換銀加水五兩以局票換銀加水四兩以湘平補足庫平加水四兩一錢七分

一舊章稅務各局報解稅銀向由藩司庫驗收此次復開稅務係因攤賠洋欸起見籌欸事件由新餉所經理以後稅務各局報解征收銀兩應改歸新餉所驗收核報以歸畫一

一總局關防鈐記一顆其文曰新疆全省稅務總局關防哈密古城綏來阿克蘇吐魯番瑪喇巴什六分局各發鈐記一顆

一總分局任用人員及薪水局費總局提調一員月支薪水銀四十兩跟丁二名月各支口食銀三兩文案一員月支薪水銀二十四兩跟丁一名月支口食銀三兩核銷收發各一員月各支薪水銀二十四兩跟丁一名月支口食銀三兩收發文牘一員月支薪水銀十六兩跟丁一名月支口食銀三兩票書算書各一名月各

支薪水銀十二兩平書一名清書二名月各支薪水銀八兩清書  
公用伙夫一名月支口食銀三兩總查一員月支薪水銀十六兩  
跟丁一名月支口食銀三兩巡丁什長一名月支口食銀四兩伍  
錢巡丁八名月各支口食銀四兩二錢巡丁公用伙夫一名月支  
口食銀三兩雜夫伙夫三名月各支口食銀三兩通事毛拉各一  
名月各支口食銀三兩油燭紙張每月支銷銀三十兩伙食局費  
月支銀五十兩除委員書識薪水外餘皆扣建又四月土煙上市  
應自四月起至十一月止計六個月省城委員巡丁查貨月給馬  
乾一分銀六兩六分局委員月各支薪水銀二十四兩帳友一名  
月各支薪水銀十二兩票書清書各一名月各支薪水銀八兩查  
貨司事一名月各支薪水銀八兩哈密古城阿克蘇瑪喇巴什四  
局巡丁各六名綏來吐魯番兩局巡丁各四名月各支口食銀三  
兩六錢哈密古城阿克蘇瑪喇巴什四局局費油燭紙張各二十  
四兩綏來吐魯番兩局局費油燭紙張銀二十兩跟丁伙夫每局

各一名月各支口食銀三兩毛拉兼通事每局一名月各支口食銀三兩以上哈密古城阿克蘇嗎喇巴什四局每局月共開支銀一百十四兩六錢綏來吐魯番兩局每局月共開支銀一百零三兩四錢又東南北三路卡查東路七道灣委員一員月支薪水銀十六兩巡丁四名月各支銀三兩油燭紙張月支銀二兩伙夫一名月支銀三兩馬乾一分月支銀二兩南路南梁委員一員月支薪水銀十六兩巡丁四名月各支銀三兩通事一名月支銀三兩伙夫一名月支銀三兩油燭紙張月支銀二兩馬乾一分月支銀三兩北路西大橋兼辦委員一員月支津貼銀六兩巡丁二名月各支銀三兩油燭紙張月支銀二兩以上三路查卡月共開支銀八十六兩

一各局委員查報漏稅十次記大功一次至記大功三次卽准酌委一次

一先年稅務各分局報銷按月報局由局彙報但各局遠近不同



宜各歸各報惟按季由總局彙報一次

一南山出產嵐炭煙炭派員於西大橋查收又頭煤炭派司事就煤窩地方設卡查收東山煙炭派司事於水磨溝設卡查收古牧地嵐炭土炭就地查收

改辦統捐事宜

光緒三年戶部籌辦百貨統捐飭各省妥議章程新疆巡撫潘效蘇以新省向未抽釐現徵華稅與百貨統捐名雖不同實則無異卽將來免釐加稅剔除釐金積弊而此項稅則原在無庸停免之列議請仍照舊章無庸更改部議允准但立法雖已盡善而積久或至弊生舊章雖定起落兩稅而落地時行情壅滯另行轉運仍納起稅至銷售處所再完落稅甚至一貨入境征稅至四五次不等稅課其名而釐金其實商民之叫苦已數數矣於是總稅局以起落兩稅之轉輾轉仍不如百貨統捐之直截了當詳請改辦統捐以恤商艱蒙巡撫聯魁批准蓋至是而新疆稅務凡三變矣

附錄百貨統捐章程

光緒三十四年正月

一此次改辦統捐於省城設一總局哈密古城塔城伊犁喀什噶爾莎車等處各設大局吐魯番庫車溫宿巴楚和闐西湖等處各設分局大局分局各不相轄

一大局分局每處關防各一顆其文曰某處統稅大局關防某處分局關防

一進口百貨自首局照起落收捐一道以後運往何處銷售概不重征沿途經過卡局祇蓋年月日查驗戳記立即放行其有貨物由無局地方運來者准該商報明上捐不得以偷漏論本省土產如係成莊出境自應按統捐抽收南疆八棚稅務向歸包辦流弊甚多改辦統捐後亦即照章遵辦

一稅務舊章分起落兩稅倘落地時行情壅滯另行轉運仍納起稅至銷售處所再完落稅統捐則無論轉運與否一征後再不重征

一邊境局卡捐收出口貨稅有起運卽已出境入口卽係落地之貨更無他局卡堵查者亦均照起落稅收捐以歸一律倘係進口之貨無論收捐及查驗落地局卡均應按月造具清摺開報

一商人運貨出入或車載或駝運每箱每包重至數百斤不等應照章以二百四十斤爲一担均應秤准斤重核實經收不得籠統估計其有不及担者亦按斤數核算免滋舞弊但担頭斤重雖屬畫一而貨值高低不一稅銀多寡懸殊各局卡經收貨捐須將貨之名色斤數明白填載票內並於箱面註明某貨若干件某貨若干斤不准籠統填寫京貨幾担川土貨幾担以便稽查而免作偽若貨既由起稅局卡稱驗某貨若干斤計若干担開具清單黏貼封條沿途查驗局卡祇可抽查一二件票貨吻合立予蓋戳放行否則逐一開箱點驗照章罰辦惟查驗不得故意挑剔希圖需索致干嚴究

一客商裝運起貨之時須報明該處局卡委員限同驗明貨物裝

箱每箱斤重若干應編列號數將裝運各貨載明執照並由局發給封條眼同客商黏貼另開細數清單須與執照相符仍蓋用該局鈐記一並黏貼箱上以便沿途稽查且以杜舞弊

一貨物於起運之先須指明落地倘經過處所行情甚好可以發賣不願赴落地之處卽報明該處局卡准其發賣一面由委員移明起運及落地兩局以便稽查如無此等情形貨至落地時該商人須於貨未卸載之先持票呈報局卡委員眼同逐箱開驗方准銷售如不報明委員私自開箱寄貨卽以舞弊論倘實有事故不能一時盡開准將未開貨箱黏貼局印封條俟次日再揭同看驗惟不須延逾五日如有以多報少以細報粗情事按照定章辦理該司巡亦不得有受賄徇私等弊究出定予嚴懲

一貨物落地繳照後倘行情壅滯准該商報明該處局卡另給分運執照或全運或擇運或另易商民承運悉從其便不再取分文一如查驗貨票不符責令該商補出稅銀外按五倍議罰其無票

之貨則全數充公仍須查明由何處局卡起運切實查辦如第一局卡查出起貨單不符將起稅委員罰辦他局處卡查出沿途局卡貨單不符將經過該局卡委員罰辦如落地委員查出以上局卡貨單不符一律分別罰辦其起稅之局員尤應加倍嚴懲仍將查出之委員記功記功三次折一酌委果係商人偷漏自應按章罰辦倘委員書記通同舞弊亦按情節輕重分別辦理重者詳參輕者撤委書巡等提案究治惟是各局卡查出無票之貨及貨票不符各罰款均須實報以五成充公以五成提賞如敢蒙蔽或商人控告或鄰局稟報即將該局卡究辦

一各局添寫聯票所收銀數須於四聯合縫中端正大寫蓋用本局卡圖章年月日亦均大寫蓋用關防鈐記如有罰款即接寫在收捐數目之下不准遺漏

一凡進口出口統捐一律收銀出票之局每銀一兩准劃扣津貼一分查驗局卡截留查驗票時每銀一兩准給津貼一分按月將

截存驗票銀數彙報總局照數開支津貼如無驗票不得支領落地局卡每銀一兩准給津貼一分將截留執照亦按月申報除收捐局卡准於收捐銀內劃留津貼外其查驗落地兩處均按季造冊請領不得支

一南北兩路各局卡所用錢秤參差不一商人藉爲口實改辦統捐一律通用庫平其平應由總局較準法碼及大秤標刻總局字樣編列號數通發局卡各一分以昭公允而免抑壓

一辦捐委員以兩年爲差滿之期如果得力聽候留差以資鼓勵減色中飽溢差又邊培局卡有起連卽已出境入口卽係落地之貨中間無查驗局卡堵查全賴各委員嚴督司巡激發天良認真經收按月盡數報解以濟公益若商同輕減稅則並不出票侵吞稅款者一經查出或被告發除追贓外定行參辦不貸將司巡人等一體治罪

一驗查局卡貨可收則以拿獲偷漏爲專責計獲款在百兩以

上者准記大功一次積至六功咨司酌委以昭激勸

一解繳征收銀兩仍照舊章選解司庫距省遙遠之局就近解交道庫

一各局委員薪水六大局委員各一員月各支薪水銀五十兩帳友各一名月各支薪水銀十六兩清書票書每局各一名月各支薪水銀十二兩查貨司事各二名月各支薪水銀十二兩巡丁各四名月各支銀五兩跟丁伙夫每局各一名月各支銀三兩毛拉兼通事各一名月各支銀三兩六錢局費油燭紙張照舊各支銀二十四兩六大局月各支銀一百六十七兩六錢六分局委員各一員月各支薪水銀四十兩帳友各一名月各支薪水銀十六兩票書兼清書各一名月各支銀十二兩加津貼銀三兩查貨司事各一名月各支薪水銀十二兩巡丁各四名月各支銀五兩跟丁伙夫每局各一名月各支銀三兩毛拉兼通事各一名月各支銀三兩六錢局費油燭紙張月支銀二十兩六分局月各支銀一百

三十二兩六錢

一各色貨物分爲綢緞類洋綢貨類洋貨類布疋類細雜貨類粗雜貨類山雜貨類土雜貨類細海菜類粗海菜類棉花類估衣類磁器類紙張類藥材類布衣類水芋類茶葉類皮貨類帽類銅鐵錫鉛類木料木器類作成担頭按稅則起落稅並徵其綢緞類布疋類藥材類水芋類茶葉類則分地道皮貨類則分上中等下等估衣類則分綢布表裏細毛以及老羊皮等銅鐵錫鉛類則分生熟華洋器皿木料木器類則分廣狹厚薄斤重此外各類亦但分其精粗他若古玩玉器照洋關正稅值百抽五加子口稅二五每值百抽銀七兩五錢和闐玉環每百斤抽銀二兩本地鹿茸照舊章估本抽收

一各項稅則尾注不足担者按觔核收及布疋每疋樹每根完銀若干之類俱係指各行商販運貨成担整數之外尙有畸零尾數照章扣算而言若本地窮民手携背負布疋瓜果及販賣一切零星



貨物以易升斗之需向不出境貨物例不納稅自在豁免之列

全省實收稅數

光緒二十八年總分局共收稅銀九萬八百七十六兩三十三年共收稅銀七萬七千三百一十四兩五錢其餘年分雖不盡同而大數亦不相遠

新疆圖志卷三十二

食貨一

鹽法

生人不可一日無食也卽不可一日無鹽鹽固天然之利益哉管子海王篇之言曰十口之家十人食鹽百口之家百人食鹽終月大男食鹽五升少半大女食鹽三升少半吾子食鹽二升少半是故鹽爲人生必需之物斯時政爲治賦有定之利齊地狹民稠三面濱海土地所出不抵山海所出三之一故管子治賦田賦輕而山海之稅重海濱之民大興鹽利山西平原之國皆仰給食鹽于齊而齊國以富故桓公欲藉臺雉管子以爲毀成欲藉樹木管子以爲伐生欲藉六畜管子以爲殺生欲藉人管子以爲隱情桓公曰然則吾何以爲國管子獨以官山府海對蓋管子深知治國之道必先視地宜以治民事所以重視乎鹽政如是耳夫新疆亦鹽國也北路如塔城之鹽精河之鹽迪化之鹽皆其表表著者南路

如焉耆如吐番如塔城如鄯善如伽師幾於無處非鹽新疆固產鹽之奇區也有鹽灘焉有鹽山焉有鹽地焉有鹽池焉舉大地產鹽之地幾備所缺者非與海耳嗚呼準此以言新疆雖謂新疆無百里外無鹽產者可也然而斥鹵自然之利如此其大而經政之所以未興者何哉蓋自乾隆中葉新疆畢隸版圖歷嘉道以來多計在兵事而未遑他顧改省之後大局粗定亦未嘗計及此蓋當時協餉充足固無庸他慮耳邇來人戶較多加以新政繁興協款不繼惟山澤者遂因之計及焉蓋嘗綜而考之鎮迪道屬鹽區十有六阿克蘇道屬二十二喀什噶爾道屬九十五伊塔道屬五產鹽之盛蓋不可以量計物產之精華磅礴鬱結普利邊徼審其土宜有類淮鹽者有類四川子鹽者有類甘肅甯夏之湖鹽西甯之青海鹽者多出天然無事熬煎自光緒三十四年開通鹽務至宣統元年爲官督商辦者三如精河歲包定額徵銀萬四千四百兩迪化歲包定額徵銀平銀五千一百兩現在甫經改辦官銷鄯善

歲包定額徵銀二千數百兩此包有定額者也巴里坤運入哈密  
之鹽疏附抽稅充作漢語學堂經費之鹽歲銷多寡曾未經商包  
辦此其無定額者也若焉耆若塔城若溫宿各府廳州縣均經稟  
請試辦而當道罔知其利倦於提倡延宕不果行論者惜之此新  
疆所以有鹽無法也雖然鹽之利民者恒便益於他物矣新疆之  
取鹽尤便益於他省矣嘗思之五穀利民者也而不播種不可成  
百果利於民者也不植本不可實是發生之始無不需人以先  
之鹽獨不然出之天產得之地脈但用人力吸收其利耳然他省  
鹽利卽以人力吸收其用力猶多也淮鹽川鹽當用煎浙鹽廬鹽  
當用晒惟新疆之鹽有因風而化其所以化者地處極北風力極大琴山而得者如吐蕃  
如是而無法以行之得毋負天工棄地利而靳民食歟然而使疆  
民無待於食鹽或運鹽無利於疆省立法猶可緩也今統計疆民  
戶四十餘萬口二百餘萬均不可以淡食而駝羊數千萬又必待  
鹽而後生活按丁計鹽按鹽計課歲十餘萬又公家之所待用若

仍前悠忽以處之無惑乎私梟充斥官引滯銷不惟無益於公用且使以私銷之故集多數之游民興無窮之爭訟將因法之不立不惟無益而轉滋其弊也今將產地廣狹行銷遠近稅課有無詳著于編俾整頓鹽法者得所依據焉

鎮迪道轄府一廳四縣七

迪化府屬產鹽行銷各區

一迪化縣達板城大小官鹽池

一達板城設引岸

一迪化省城設鹽店二處

一分銷達板城官鹽各地

一官鹽每百觔定章抽稅銀六錢

迪化縣銷本治達板城之鹽

謹按縣治東南一百八十里之達板城素爲產鹽之區距城西九十里傍西樹窩子有池產鹽曰大鹽池其鹽色白味純類淮

鹽行銷阜康昌吉綏來奇台孚遠呼圖壁等處其運銷本治內者歲約八十五萬觔而距城西二十里之小鹽池則產鹽較少奇台分銷達板城之鹽並分銷鄯善七角井之鹽

謹按縣治向不產鹽除分銷達板城官鹽外由鄯善之七角井販來者歲銷市斗一百二十石按觔由鄯善照章抽稅亦有由北塔山來售之蒙古鹽無稅每歲約銷二百八十石每石重七百觔每斗價銀四五錢不等

### 昌吉分銷達板城之鹽

謹按昌吉境內向無產鹽之地城鄉所恃以爲日用之需者悉仰給于達板城運售之官鹽

### 呼圖壁分銷達板城之鹽並分銷精河之鹽

謹按呼圖壁除分銷達板城鹽歲約四萬五千觔外其由精河輸入者其數畧同每斗重七十觔每升價銀一錢四分計每觔約需銀二兩

阜康分銷達板城之鹽

謹按縣治土性乾燥向不產鹽境內食鹽悉由達城板運入稅由迪化派司事抽收計鹽一斗價銀四錢八分斗可七十觔

孚遠分銷達板城之鹽並分銷鄯善七角井之鹽

謹按縣治向不產鹽除分銷達板城官鹽外由七角井運入者每斗重七十觔值一兩四錢兩處合算年共銷四萬餘觔稅由迪化鄯善二縣抽收

綏來縣分銷達板城之鹽兼運食土鹽

謹按縣治距城五百里唐朝渠之東鹽池長四丈廣三丈產鹽色兼黃白味純又南鹽池周圍約二里色同味稍減爲蒙古運入境內銷售間亦運銷阿爾泰山及孚遠奇台一帶初東鹽池之鹽擬有稅額每駝馱抽稅銀一錢五分驢馱抽稅銀五分歲銷無定額稅亦無多歸公旋罷稅又一百六十里沙門驛鹽池長僅及丈廣一尺鹹水盈池不結顆粒其入境運售者多係達

板城官鹽每石重七百觔值銀拾四兩

以上均爲迪化府屬產鹽之地共五處惟達板城大小兩鹽池自光緒三十四年照精河鹽池官督商辦之法每年擬定每百觔抽稅銀六錢合計鹽價銷場年共呈繳滙平銀五千一百兩擬繳總稅局租銀六百兩外餘俱提作府設模範小學堂經費宣統元年秋迪化府於達板城設引岸

吐魯番直隸廳屬產鹽行銷各區

一廳屬鄯善縣七角井東西官鹽池

一分銷七角井官鹽各地

一每百觔定章抽稅銀六錢

吐魯番連食本治鹽

謹按廳治南鄉底湖莊南山以北之鹽灘距城九十里其灘縱二百五十里橫一百二十里中有產鹽之池六七處淺深大小各各不同鹽色白味純歲銷約四五十石石重七百觔約值銀



二三兩不等惟漢回用之每年由鹽灘附近貧戶以驢駝運載銷售至於繅民率食石鹽均由雅木什葡萄溝洋海勝金口托克遜等處山麓採取自行運用色雜味純歲出亦十餘萬觔以上無運銷境外並無自外來售者向不納稅

鄯善運銷本治七角井之鹽

謹按縣治七角井驛東鹽池之鹽分三層上層硝鹽中層白鹽味均苦不堪食下乃青鹽味極佳有大小顆粒之別行銷哈密巴里坤木壘河老奇台古城孚遠各處銷境內者歲約三四十萬觔其西鹽池產鹽較少

以上吐魯番屬產鹽之區共十數處前開鄯善七角井驛東西兩鹽池由驛站畧抽鹽稅聽民自取自光緒三十四年照精河鹽池官督商辦之法包定鹽價稅課每年共計銀二千數百兩稟請立案永作本地辦公經費

鎮西直隸廳分銷鄯善七角井之鹽兼食土鹽

謹按應治浦類海其北岸距城四十里中有池產鹽色白味苦不適於食歲銷不過二十餘車價以升斗計每車約載一石重六百觔每斗值銀八分又距城北二百四十里塘湖下之蘇海闊有池周十餘里產鹽色味尤劣且路遠無採用者若距廳西三百六十里之七角井東西鹽池舊屬廳治今劃歸鄯善本廳境民年運食者約居全境食鹽數之半其地由與哈密毗界二百四十里之東山鹽池馱運來城者爲數亦多每馱重一百八十觔每觔僅紅錢一枚許無稅

哈密直隸廳分銷七角井之鹽兼食土鹽並運銷巴里坤之鹽謹按應治距城東南一百四十里之長流水有鹽灘周圍四十里掘上尺餘卽見白鹽名曰土鹽質輕味稍苦歲銷十餘石每斗計重四十觔價銀貳錢五分歲不敷用境屬除分銷七角井官鹽外恒分銷巴里坤運入之青鹽堅實結顆每斗重七十觔值銀六錢歲銷十餘石此鹽一入哈境由稅局抽稅報公

庫爾喀喇烏蘇直隸廳運食土鹽並分銷大小拐之鹽

謹按廳治迤西三十餘里之甘河子地方鹼灘袤延至四棵樹方圓約六十餘里有水處皆產鹽白色而味苦本境戶民不食惟游牧蒙古人自取食之無稅並恒分銷綏來大小拐之青鹽每斗重六十觔值銀八分味純美歲銷約二十餘石亦不納稅以上三廳產鹽之區共四處除分銷七角井官鹽并哈治分銷巴里坤青鹽有稅外餘俱無

阿克蘇道轄府二州二縣六

焉耆府屬產鹽行銷各區

焉耆府運食本治鹽

謹按府治西南七十里之紫泥泉迤北有鹽灘一處廣四里長六里色劣味苦每年產額因無稅故未知確數間有纏民私行運至蒙部販賣每鹽一斗約四十觔值銀九分公家向未過問近有纏商海底甫者稟請焉耆府試辦後請票抽稅既承批辦

將鹽運至土爾扈特之孔古斯地方銷售精河鹽商恐礙有稅要奪之去焉耆府遂電商伊犁府妥籌商辦尙待舉行

### 新平運食本治鹽

謹按縣治遠近盡斥鹵之地其鹽色白中帶微紅質堅多結塊間有黑色者其質性川水浸之結方解而後用味殊佳然遠地無貨之者

### 婁羌運食本治鹽

謹按縣治四境產鹽之區甚多其西南距城三十里之卡拉希灘灘屯約四十里廣三十里灘下尺餘卽鹽厚二三尺不等色黑味純畧雜沙石供附近回堡並卡克里克吐魯番莊特底浪莊三十里鋪各屬民食歲銷約萬觔左右又城西一百八十里凹石硤莊東南半里許灘一長八里廣六里掘土尺許卽見黑鹽厚三四尺味純僅爲該莊食用歲約銷三千觔又城東一百八十里之阿不且莊折而東南約二里許有池水深一尺至

四五尺不等長九里廣八里夏秋二季水涸時池而皆成白鹽味銷苦厚四五寸歲出二千觔供阿不且密遠拓克三莊之用又城北一百二十里曰羅布莊由莊偏東北二十里有池一長六里廣五里平時水深二三尺不等每逢夏秋水乾池而結鹽晶瑩如鑑厚可四五寸色白味純僅供羅布起克拓素加以四莊之用歲銷約五千觔又城北四百二十里之阿拉罕驛順驛路東南半里有池一長三十丈廣二十四丈水深一二尺夏秋水涸時鹽可二三寸厚西北十里又有池二相距半里左池水深尺許長一里廣半里許該右池深約一尺五寸長廣均約里許二池逢夏秋之際水皆涸鹽出厚均約尺許色白味純三池產鹽均供夜密蘇莊一處之用歲銷約七千觔以上諸產鹽區均爲戶民自取自食向未納稅亦不外運

輪臺運食本治鹽

謹按縣治距城東三十里道傍有鹹灘一縱約八里橫二十里

鑿取之成塊故名曰塊鹽似沙非沙質堅色黑味清而微苦  
水澆之食貨於市者以驢馱運賣每驢連約百觔僅值銀四五  
分運至屬境之洋薩爾野雲溝一帶銷售以路爲遠價較增每  
百觔或九分一錢不等歲銷萬餘觔無稅

以上爲焉耆府屬產鹽之區共十餘處均運銷本境各地無  
稅

溫宿府產鹽行銷各區

溫宿府分銷溫宿縣之鹽

謹按府治向不產鹽恒分銷溫宿縣屬北上之鹽山口一帶運  
來者味純每百觔值紅錢一百四五文不等每月計八棚四  
期每逢八棚約銷二千觔計年銷約十萬餘觔纏民貧者多不  
求味純每取鹹地斥鹵熬水以佐食焉無稅

溫宿縣運銷本治鹽

謹按縣治距城北二百里爲鹽山口深谷支分層巒峭壁滿目

皆赤壤綿亘百數十里高至五六十丈不等山左迤東爲可拉阿瓦提又名穹阿瓦提產鹽瑩潔若水晶狀俗呼之爲水晶鹽味正質堅色白又名爲石鹽其中偶結一枝如雪附冰者名爲鹽根直至山頂上面浮紅下卽白鹽片每鹽片重至五六十觔不加熬煉研細卽食爲戶民所必需以上三種鹽質味俱佳每觔值紅錢二文又山石迤北爲阿拉阿瓦提鹽夾紅土又北爲克濟阿瓦提鹽土相雜又阿濟克阿瓦提一經雨後始地面結鹽色如硝味苦澀每觔值紅錢一文然食之者稀光緒二十八年省城總稅局以各屬產鹽甚夥利棄於地殊爲可惜通飭開辦每鹽一石定徵稅銀一兩三錢五分一稅之外聽其運售他處無再徵嗣經阿克蘇分局稟准每百觔改徵稅銀一錢二分每觔准售紅錢四文於二十九年設卡試辦時民皆以稅重價昂煮食鹵泥每月計八棚四期逢期僅銷鹽千餘觔通計收數不敷開支遂停辦收稅

柯坪分縣運食本治鹽

謹按柯坪一屬斥鹵之地十居六七惟城東十餘里之麟灘長廣各三十里許產鹽質堅色白而帶微黃味不雜掘取之者以水煎之澄去泥滓盛以壺以備用居民千餘戶俗尙食饌飲水佐以瓜果桑葢不爲羹故弗用鹽或作抓飯用數亦無幾鄰境溫宿喀什一帶鹽產多且佳故柯鹽無運銷境外者無稅

拜城運食本治鹽並分銷庫車之鹽

謹按縣治北之托孜巴什馬扎山距城六十里又北之古里阿提瑪扎山距城七十里周約十里二處產鹽均紅色味純又折而西北距城三百五十里爲庫勒呼勒克山皆塊鹽色白味純民間隨地開窰採取佐食間有運販者每觔僅值紅錢一文亦有水晶鹽價稍昂時亦分銷庫車之鹽

以上溫宿府屬產鹽之區共十餘處均運銷各本境無稅

庫車直隸州屬產鹽行銷各區



庫車運食本治鹽並分銷塔城鹽

謹按州治距城北一百二十里之巴拉海提山長約七八里廣四五丈產石鹽質堅結色白味純每觔售紅錢二文月銷四萬觔有零又城東之烏恰拉莊之鹹灘長十里廣五里俗呼曰土鹽質鬆色黑味苦價甚賤每百觔值紅錢三四十文月銷三四萬觔又距城南十五里之哈拉布哈莊鹹灘長五里廣三里距城四十里之排樓莊之鹹灘亦長五里廣三里又距城西六十里之布素特莊鹹灘長三里廣二里均曰土鹽質色俱劣價賤鄉民掘食無運售者境內食鹽年恒分銷塔城運入者每觔值紅錢四五文歲逾二萬觔

沙雅運食本治鹽並分銷境外運售之鹽

謹按縣治地而遼濶半屬鹹灘產鹽之地點點若星羅棋布民間多資境外運售者每觔值銀一分大半皆來自庫車溫宿等處無稅

以上庫車州屬產鹽之區共六處並境外來銷之鹽均無稅  
烏什直隸廳運食本治鹽並分銷溫宿之鹽

謹按廳治西之托司滿山距城三十五里山長廣約十餘里產  
鹽色白間雜有土以水化食歲產三四萬觔歲銷三萬餘觔每  
觔值紅錢一文無稅又分銷溫宿塊鹽分青紅白三色味純無  
土歲銷約二三萬觔每觔值紅錢三文

以上產鹽之區一處恒分銷溫宿縣之塊鹽無稅

喀什噶爾道轄府二廳二州二縣六

疏勒府屬產鹽行銷各區

疏勒府運食本治鹽並分銷疏附阿爾瓦特莊之鹽

謹按府治產鹽皆戈壁高燥之區零崎片段所在皆有每值春  
時鹹氣上升凝結成塊名曰鹵鹽色黑白相間雜以泥沙如灰  
土狀味亦近鹵以水浸之去渣而食四境民咸賴之每觔值紅  
錢一文歲銷十五六萬觔地接疏附屬東北阿爾瓦特莊鹽區

運入者色黑味純每百觔值銀三錢歲分銷二十餘萬觔

疏附運食本治鹽

謹按縣治距城東北九十里阿爾瓦特莊與伽師大阿圖什莊毗連鹽產兩界中廣約三十里長約十里地屬戈壁鹽雜泥沙色黑味微甘非澄之不能食除運銷本府外售本境者歲約一百四五十萬觔每百觔值銀三錢又一百四十里烏帕爾莊鹽產於石山麓之泥土中其地長四五里寬約三四丈入炎夏日烈時成鹽最盛質白如糝粉味略苦以水調之成塊鹽經冬日甚寒或雨雪則不產每塊重四五觔者值銀二分僅供本莊之用歲銷約四五萬觔又西南塔什密里克莊距城一百五十里有石山高八丈長約六七里洞之得鹽堅如石色分紅青味俱純歲銷二十餘萬觔半銷英吉沙爾每百觔值銀一錢邇來塔什密里克莊纏目人等設一公立漢語學堂稟請准每百觔抽租銀二分五釐以作經費

伽師運食本治鹽

謹按縣治四境多硝土鹽灘悉爲間土之塊鹽如距城東六十里英阿瓦台莊又東百四十里至代里克村歲共出鹽五百二十驢馱城西二十里庫木艾勒克村歲共出鹽六百數十驢馱其城北鹽區較廣如二十里之鐵甲木村三十五里之和夏瓦台村百數十里之格達梁莊折而東南一百七十里克郎克業斯村一百八十里麥希提村一百九十里鐵板克滿勒村歲共出鹽二千驢馱有奇城西南四十里求拉克村又十里阿拉穩村又十里阿巴和迦等村歲共出鹽一千四百驢馱有奇色味俱雜率皆纒回取用間有運販者值銀僅六分惟距城東北百四十里之管必蘇迤西有鹽池一產顆鹽色青味純每馱重百二十觔每觔值銀五釐以價較昂惟漢民購用之

英吉沙爾直隸廳分銷喀什青鹽

謹按廳治斥鹵之地無大片段鹽中且多鹹貧民咸取之水浸

方食中戶以上率皆分銷喀什運來青鹽每觔值紅錢四五文不等歲銷約二萬觔無稅

以上疏勒府屬產鹽之區十六七處除疏附之塔什密里克莊纏目稟請每百觔抽稅銀二分五釐充作漢語學堂經費外餘俱無稅

莎車府屬產鹽行銷各區

莎車府運食本治鹽並分銷喀什青鹽

謹按府治鹽區五十有二近民居者三一日鹽灘在西城西四十五里阿瓦提莊長約四十里廣十五六里每年當夏秋之交天氣燥旱產鹽較多其色白其味苦僞爲本地方纏民買賣提庫萬資的拉等之祖開賣至今仍之價以大小馱計大者值紅錢五六十文小者三十文一日鹽山在距城西八十里熱瓦齊莊長自廿里廣二十里盡塊鹽色青味純歲銷十萬觔運銷葉城邊境一帶者恒十之一每百觔值紅錢一百四五十文一亦

曰鹽灘在距城七十八里英額斯塘莊長不過三里廣僅一里色亦白而味亦苦本境用之間亦分銷喀什青鹽類四川子鹽多係漢人購食歲銷三千餘觔每觔價紅錢六七八文不等

葉城運食本治鹽

謹按縣治附近地多斥鹵產鹽半雜沙石其色黑其味苦掘食者悉纏民或鬻之市市時不用觔秤升斗惟以鹽塊之大小計重四五觔者值紅錢二三文非澄去泥沙弗能用以長年算之歲約銷七十餘萬觔若距城東北百十里之高那塔塔莊鹽產亦多質潔味純此外城北七十里一肯蘇莊屬阿拉克九十里坡斯莊屬阿拉勺又東北六十里江格艾斯口等莊鹽皆佳產無幾咸爲漢民商賈所購食者此獨以秤計每百觔值銀三四錢不等歲約銷十萬觔其邊境亦恒分銷莎車之鹽無稅

皮山運食本治鹽

謹按縣治四境皆產鹽距城東二百六十五里之帕卡地方南

二百八十里之塔哈西一百七十里之波內北一百四十里之阿沙提坤悉等地鹽由貧民自行挖運鹽色黃味苦熬水食之稍有力者悉是外來運販之鹽

### 巴楚運食本治鹽

謹按州治東南之玉河距城一百四十里其南岸有土斯洛克山縱約四十里橫三十里鹽多且佳纏民俗呼鹽爲土斯故以此名冠其山土人洞取之悉屬塊名曰塊鹽運銷本城及治屬之五台鐵里木華麥提等處每斗重六十觔值銀壹錢五分

### 蒲犁廳運食鄰境鹽

謹按廳治鹽區向少多資食鄰境之鹽歲銷無定數

以上庫車府屬產鹽之區六十餘處悉運銷府屬各地方無稅

### 和闐直隸屬產鹽行銷各區

### 和闐州運食本治鹽

謹按州治距城東南四十里附郭之圖薩拉明扎木達莊哈其莊鹽區毗連長至二千丈寬一千八百二十五丈歲出鹽三萬餘馱色黃味微苦距城西南四十里伯爾莊明苦沙莊卡五牙莊偏南有灘產石鹽長五里寬三里歲出鹽一千二百馱又距城迤西一百二十里偏北奎雅明鴿子灘至塔黑特欄杆之鹽悉紅色其地長約四十里寬二里歲出鹽二千餘馱胥運至本明及各明各八欄銷售大馱約百舫值紅錢四五十文小馱約六七十舫值三四十文又奎雅明北二十里塔吾卡子欄杆北之鹽色黑塔吾卡子南之鹽色白味俱澁而價亦減至如城西北一百四十里布花明色拉克莊哈拉沙爾明哈拉沙莊之下尾灘城西南六十里卡浪古明土沙阿哈其莊商山之下石灘卡浪古明接壤之伯爾藏俱白色鹽味雜附近居民咸自取食于闐運食本治鹽並分銷和闐之鹽

謹按縣治距城東三十餘里之又新莊又六十里之白什多洛



可莊兩處有鹹灘產鹽色味俱不純盡數運銷本境每斗重十二觔值銀三分歲約銷三十萬觔間亦有分銷和闐之鹽者其價稍昂

洛浦運食本治鹽並分稍和闐之鹽

謹按縣治距城東五十里之多羅莊其迤南四十餘里名海侯莊比之牙莊迤北二百八十餘里名塔瓦克明之數處鹽形類磚塊上鹹而下帶沙石澄之方堪食每驢馱重五六十觔值銀五六分歲約銷十四五萬觔若和闐之純子鹽每百純重三觔值紅錢一二文惟流寓漢民分銷之歲約二百餘觔之譜

以上和闐州屬產鹽之區十有七處無稅

伊塔道轄府一縣二廳三

伊犁府所屬產鹽行銷各區

綏定分銷精河之鹽

謹按縣治向不產鹽分銷精河官鹽計觔兩不計升斗每觔值

銀二分五釐照精河鹽局定章抽稅歲銷約八十餘萬觔

甯遠分銷精河之鹽

謹按縣治分銷精河官鹽以駝運取道果子溝每觔值銀二分五釐照精河鹽局定章抽稅歲銷約一十四萬觔

霍爾果斯分銷精河之鹽

謹按廳治向不產鹽恒分銷精河官鹽每觔值銀二分五釐照精河鹽局定章抽稅

精河直隸廳產鹽行銷各區

一精河官鹽池

一分銷精河官鹽池方

一精河城東關大河沿各設私緝卡並各分銷店一處

一精河鹽湖設撈鹽緝私局一處

一甯遠屬東鄉麻札爾設分銷店一所

一綏定惠遠廣仁瞻德拱宸等五城各設分銷店一所

一級定西關設緝私卡一處

一三台係進口總路擬設緝私卡一處

一每千觔鹽定章抽稅銀二兩

精河運銷本治官鹽池之鹽

謹按廳治距城東三十里過黑山頭偏北有鹽池一名鹽湖長廣約十餘里在戈壁中而結堅壳隨處將壳播起清水漲出鹽浸入水底深至二尺許味極鹹以鐵耙提撈之如面積二丈能撈鹽三四堆每堆約十餘石然新撈之鹽色淨而溼重不便於運載若陳堆雖經風吹色惡去其外浮瑩白如雪且此池鹽經久撈之不形少減又城西四十里之永集湖城北二十里之忙各布魯合此數小鹽池官督商辦每年約定銷鹽二三百萬石之譜每石重一千觔價銀四兩除人工費用外計之可收銀九千六百兩每千觔鹽酌收稅銀二兩可收銀四千八百兩合計場價課稅共色銀一萬四千八百兩行銷伊犁九城滿漢軍民

附近各地方

附錄精河城西北百四十里之博羅塔拉地屬蒙古亦產鹽無多色黑味苦聞察哈營畧收以佐營兵之費

塔城直隸廳運食本治鹽

謹按廳治距城東南六百餘里之鹽池寬數十丈長二里餘產鹽質堅色白而微青味亦純名曰青鹽池顆粒天成取多取寡池無增減又距城西南六百餘里有池產鹽色若白而紅味較劣均在蒙古牧地悉蒙古民運販之經前辦塔城釐金知縣李某稟請照省城鹽稅章程試辦不果現擬又招商試辦於認繳稅款內分四成作吐爾扈特親王津貼以四成作辦理地方自治經費餘二成解作鹽課業經稟請待辦

以上伊犁府屬產鹽之區共五處惟塔城廳不分銷精河官鹽無稅